

STUDENTSKI PARLAMENT UNIVERZITETA U TUZLI

**PRAVILNIK O IZBORIMA ZA STUDENTSKI
PARLAMENT UNIVERZITETA U TUZLI I
STUDENTSKA VIJEĆA/UDRUŽENJE SC NJEGOVIH
SASTAVNICA**

Tuzla, oktobar 2017. god.

Na osnovu člana 7. stav (1) tačka f) i člana 41. Statuta Studentskog parlamenta Univerziteta u Tuzli broj: 06/1-05-013658/17 od 25.04.2017. godine, Predsjedništvo Studentskog parlamenta na sjednici održanoj 25.10.2017. godine donosi

Pravilnik o izborima za Studentski parlament Univerziteta u Tuzli i Studentska vijeća/Udruženje SC njegovih sastavnica

I. OSNOVNE ODREDBE

Predmet normiranja

Član 1.

Ovim Pravilnikom uređuju se pitanja značajna za postupak i procedure izbora za studentske predstavnike/delegate za Studentski parlament Univerziteta u Tuzli (u daljem tekstu: Studentski parlament) i Studentska vijeća/Udruženje SC njegovih sastavnica.

Osnovni pojmovi

Član 2.

- (1) Organizacione jedinice Univerziteta u Tuzli čine fakulteti, ADU i Studentski centar.
- (2) Prilikom izbora za organe Studentskih vijeća/Udruženja SC organizacionih jedinica, kandidovati se i glasati mogu samo studenti koji se vode na toj organizacionoj jedinici.
- (3) Terminologija korištena u ovom Pravilniku podrazumijeva oba spola.

Biračko pravo i uslovi za provođenje izbora

Član 3.

- (1) Studentske predstavnike/delegate za organe Studentskog parlamenta i Studentska vijeća/Udruženje SC njegovih sastavnica, imaju pravo birati svi studenti sa sva tri ciklusa studija Univerziteta u Tuzli.
- (2) Izbori su neposredni, slobodni i tajni i moraju biti provedeni na način koji osigurava rezultate izbora sukladno stvarnoj i slobodnoj volji birača.
- (3) Predsjedništvo Studentskog parlamenta osigurat će sve uslove (prostorne, tehničke i dr.) za nesmetano provođenje izbora i potrebnu pomoć izbornim tijelima u obavljanju njihovih zadaća.

Organi Studentskog parlamenta i njegovih sastavnica

Član 4.

- (1) Studentski parlament ima sljedeće organe:
 - Skupštinu,
 - Predsjedništvo,
 - Predsjednika,
 - Generalnog sekretara,
 - Studenta prorektora.
- (2) Skupštinu Studentskog parlamenta čini po pet studenata iz svakog Studentskog vijeća fakulteta/ADU, kao i pet studenata iz Udruženja studenata Studentskog centra, koji mogu biti zastupljeni iz sva tri ciklusa studija.
- (3) Konstituirajuća i izborna sjednica Skupštine Studentskog parlamenta održava se u prvoj sedmici mjeseca aprila, a delegati za istu od strane verifikovanih Studentskih vijeća/Udruženja SC delegiraju se najkasnije do 15. marta.
- (4) Skupština Studentskog parlamenta iz svojih redova, postupkom javnog glasanja, bira predsjednika i zamjenika predsjednika Studentskog parlamenta, predsjedavajućeg Skupštine Studentskog parlamenta i zapisničara.
- (5) Predsjedništvo Studentskog parlamenta čine predsjednici Studentskih vijeća/Udruženja SC i predsjednik Studentskog parlamenta.

Član 5.

(1) Studentska vijeća/Udruženje SC imaju sljedeće organe:

- Skupštinu,
- Upravni odbor,
- Predsjednika.

(2) Skupštinu Studentskih vijeća čine predstavnici studenata/delegati svih godina studija prvog ciklusa svih studijskih odsjeka, i po jedan student predstavnik sa drugog i trećeg ciklusa ukoliko su organizovani, i to:

a) na organizacionim jedinicima koje imaju pet i manje odsjeka i nemaju zajedničkih godina studija, biraju se po tri studenta sa svake studijske godine odsjeka, i po jedan student sa drugog i trećeg ciklusa studija,

b) na organizacionim jedinicima koje imaju pet i manje odsjeka, i imaju zajedničke godine studija, biraju se, na zajedničkim godinama po tri studenta po odsjeku, a za godine studija koje nisu zajedničke, po tri studenta sa svake godine odsjeka, i po jedan student sa drugog i trećeg ciklusa studija,

c) na organizacionim jedinicima koje imaju šest i više odsjeka, bira se po jedan student sa svake godine po odsjeku, i po jedan student sa drugog i trećeg ciklusa studija,

d) na organizacionim jedinicima koje nemaju odsjeke bira se po devet studenata sa svake godine studija, i po jedan student sa drugog i trećeg ciklusa studija.

(3) Upravni odbor Studentskih vijeća, bira Skupština Studentskog vijeća, i to:

- a) za fakultete sa pet i manje studijskih odsjeka, po dva studenta sa svakog odsjeka,
- b) za fakultete koji imaju više od pet studijskih odsjeka, po jedan student sa odsjeka,
- c) za fakultete koji imaju dva studijska odsjeka biraju se po četiri studenta sa odsjeka,
- d) za fakultete bez studijskih odsjeka biraju se po tri studenta sa svake godine studija,
- e) po jednog člana iz drugog ili trećeg ciklusa studija.

(4) Skupština Udruženja studenata Studentskog centra će biti organizovana u skladu sa Statutom Udruženja studenata SC.

(5) Upravni odbor Udruženja studenata SC, bira Skupština Udruženja studenata SC, u skladu sa Statutom Udruženja studenata SC.

Član 6.

Predsjedništvo Studentskog parlamenta ima nadležnost nad Studentskim vijećima/Udruženjem SC u njihovom organizovanju i radu.

II. RASPISIVANJE IZBORA I OPĆI USLOVI PROVOĐENJA IZBORA

Odluka o raspisivanju izbora

Član 7.

Izbore za organe Studentskog parlamenta i Studentskih vijeća/Udruženje SC njegovih sastavnica raspisuje Odlukom predsjednik Skupštine Studentskog parlamenta Univerziteta u Tuzli.

Mjesto i vrijeme provođenja izbora

Član 8.

(1) Izbori za studentske predstavnike/delegate u Skupštini Studentskih vijeća/Udruženja SC provode se izričito u prostorijama fakulteta/SC, definisano ovim Pravilnikom, pod nadzorom biračkih odbora.

(2) Izbori se provode u vremenu određenom Odlukom o raspisivanju izbora koju donosi predsjednik Skupštine Studentskog parlamenta Univerziteta u Tuzli.

(3) Izuzetno od stava (2) ovog člana, ukoliko se zbog tehničkih nemogućnosti ne uspiju izvršiti izbori na pojedinim fakultetima, na istim će se produžiti rok izvođenja izbora.

III. KANDIDATURE

Uslovi koje mora ispunjavati kandidat

Član 9.

(1) Kandidat za predstavnika studenata/delegat u Skupštini Studentskog vijeća/Udruženja SC, mora biti redovan student na studijskom odsjeku/usmjerenju i studijskoj godini na kojoj se bira, odnosno stanar Studentskog centra Univerziteta u Tuzli u slučaju podnošenja kandidature za Udruženje studenata SC.

(2) Kandidat za predstavnika studenata/delegat u Skupštini Studentskog vijeća/Udruženja SC, ne smije biti aktivan član bilo koje političke partije ili stranačke organizacije, odnosno ne smije biti direktno uključen u rad iste, u vidu političke pozicije, članstva u upravljačkim i nadzornim odborima, niti indirektno, kroz rad podstranačkih organizacija, foruma, asocijacija i slično.

Kandidature za Skupštinu Studentskog vijeća/Udruženja SC

Član 10.

(1) Svaki se student osobno može kandidirati za predstavnika studenata/delegata u Skupštini Studentskog vijeća/Udruženja SC, time ne kršeći članove 2. i 9. ovog Pravilnika.

(2) Kandidatura se podnosi na obrascu kojeg sastavlja Predsjedništvo Studentskog parlamenta, a sadrži:

1. Prezime i ime kandidata i broj indeksa;
2. Naziv organizacione jedinice, ciklus studiranja, godinu studija, studijski odsjek;
3. Kontakt i potpis kandidata.

(3) Obrasci iz stava (2) ovog člana se dostavljaju Izornoj komisiji, u terminima i prostorijama definisanim Odlukom o raspisivanju izbora. Kandidatu koji je predao pomenuti obrazac izdaje se dokaz o predaji obrazca, kojeg propisuje Predsjedništvo Studentskog parlamenta.

(4) Izborna komisija će najkasnije tri dana prije održavanja izbora provjeriti valjanost kandidatura, te sačiniti liste kandidata i glasačke listiće.

(5) Kandidature koje budu neblagovremeno podnesene ili nisu sačinjene u skladu sa odredbama ovog Pravilnika, Izborna komisija će odbaciti, te sačiniti popis.

IV. POSTUPAK PROVOĐENJA IZBORA ZA SKUPŠTINE STUDENTSKIH VIJEĆA/UDRUŽENJA

Izborna komisija i birački odbori

Član 11.

(1) Izborna komisija obrazuje se od strane Skupštine, na prijedlog Predsjedništva Studentskog parlamenta.

(2) Izborna komisija ima pet članova i biraju se iz reda Skupštine Studentskog parlamenta.

(3) Predsjednik Izborne komisije odgovoran je za organizaciju rada Izborne komisije, o čemu podnosi izvještaj Predsjedništvu Studentskog parlamenta.

(4) Birački odbor ima tri člana: predsjednika, koji rukovodi radom odbora i kojeg imenuje Izborna komisija na prijedlog Predsjedništva Studentskog parlamenta i dva člana koje imenuje Izborna komisija, a na prijedlog Studentskog vijeća/Udruženja SC organizacione jedinice putem Predsjedništva Studentskog parlamenta.

(5) Predsjednik biračkog odbora odgovoran je za nazočnost članova biračkog odbora na biračkom mjestu, za organizaciju rada biračkog odbora, tajnost izbora, te za održavanje reda na biračkom mjestu.

(6) Za Studentsko vijeće/Udruženje SC koje u okviru zakazanog vremena ne dostavi prijedloge članova biračkog odbora za tu organizacionu jedinicu, Izborna komisija ima pravo i obavezu da imenuje članove tog biračkog odbora.

(7) U slučaju kompleksnosti procedure izbora na određenoj organizacionoj jedinici ili zbog drugog opravdanog razloga, Izborna komisija ima pravo prerasporediti već imenovane članove biračkih odbora.

Nadležnost Izborne komisije i biračkih odbora

Član 12.

(1) Nakon završenog roka za podnošenje kandidatura i sačinjavanja listi kandidata, birački odbori će u vremenskom periodu, koje je utvrđeno Odlukom o raspisivanju izbora u smislu člana 8. ovog Pravilnika, obaviti izbore na organizacionoj jedinici za koju su imenovani.

(2) Postupak provođenja izbora na prvom i integriranom prvom i drugom ciklusu studija, jeste takav da članovi biračkog odbora, uz prethodnu najavu, dolaze na predavanje određene studijske godine i odsjeka organizacione jedinice, a za drugi i treći ciklus u određenom najavljenom terminu, te izvršavaju postupak glasanja, na način da se glasački listići sa listom kandidata podijele studentima uz obavezno popunjavanje potvrde o glasanju. Nakon provedene procedure glasanja, glasački listići i potvrde o glasanju se propisno arhiviraju.

(3) Postupak provođenja izbora za Skupštinu Udruženja studenata Studentskog centra Univerziteta u Tuzli jeste takav da članovi biračkog odbora provode izbore na način parlamentarnih izbora, sa glasačkim listićima, potvrdama o glasanju i glasačkom kutijom.

(4) Po provedenim izborima na organizacionoj jedinici, birački odbori, u prisustvu članova Izborne komisije, kreću u postupak brojanja glasova, nakon čega sačinjavaju zapisnik i konstatuju broj glasova za svakog od kandidata, odnosno broj važećih i nevažećih glasačkih listića.

(5) Zapisnici iz stava (4) ovog člana, kao i sav izborni materijal, dostavljaju se Izornoj komisiji na usvajanje.

(6) Izborna komisija nadgleda rad biračkih odbora.

Slučaj jednakog broja glasova

Član 13.

(1) U slučaju jednakog broja glasova pojedinih kandidata, a njihov broj prelazi maksimalan mogući broj delegata za Skupštinu u skladu sa članom 5. ovog Pravilnika, postupak izbora se ponavlja samo za te kandidate.

(2) Ukoliko se i nakon ponovljenog glasanja u vezi sa stavom (1) ovog člana, ne izaberu kandidati za studentske predstavnike/delegate za Skupštinu Studentskih vijeća/Udruženja SC, izabran će biti onaj kandidat koji ima bolji prosjek ocjena.

Glasački listić

Član 14.

(1) Glasajući listići ovjeravaju se štambiljom Studentskog parlamenta (mjesto predviđeno za upis datuma) i takvi se dostavljaju biračkim odborima na dalje postupanje.

(2) Glasajući listić sadrži:

1. Naziv organizacione jedinice i Studentskog vijeća/Udruženja SC na kojem se provode izbori;
2. Naziv odsjeka i studijske godine;
3. Listu kandidata sa naznakom rednog broja ispred imena.

(3) Glasanje se vrši zaokruživanjem rednog broja ispred imena kandidata.

(4) Važeći glasački listić je onaj na kome su na listi zaokruženi minimalno jedan kandidat, odnosno maksimalan broj kandidata koji se bira u Skupštinu utvrđen u članu 5. stavu (2) ovog Pravilnika, te onaj koji ima upisan datum provođenja izbora na predviđenom mjestu.

(5) Nevažeći glasački listić je onaj na kojem nije zaokružen niti jedan od kandidata, odnosno zaokruženo je više od maksimalnog broja kandidata koji se bira u Skupštinu utvrđen u članu 5. stavu (2) ovog Pravilnika. Nevažeći glasački listić je i onaj na kome je dopisano bilo šta od strane glasača, a što nije propisano ovim članom Pravilnika.

Izvod popisa birača

Član 15.

Studentske službe organizacionih jedinica odnosno referenti Studentskog centra, u skladu sa bazom podataka sačinjavaju pregled studenata koji se vode na određenoj organizacionoj jedinici, i isti dostavljaju Izornoj komisiji.

Prigovor

Član 16.

Pravo prigovora na tok i preliminarne rezultate izbora imaju svi studenti, birači i kandidati. Obrazložen prigovor dostavlja se Izornoj komisiji.

Utvrđivanje rezultata izbora

Član 17.

(1) Ako Predsjedništvo Studentskog parlamenta primi pozitivno mišljenje Izborne komisije o provedenim izborima na organizacionim jedinicama, u vezi sa članom 12. stav (5) ovog Pravilnika, odnosno utvrdi da nije bilo povreda koje su utjecale ili mogle utjecati na rezultate izbora, utvrdit će rezultate izbora (konačnu rang listu) za Skupštine Studentskih vijeća/Udruženja SC, te ih oglasiti na oglasnoj ploči ili web stranici Studentskog parlamenta.

(2) Ako Predsjedništvo Studentskog parlamenta primi negativno mišljenje Izborne komisije o provedenim izborima na organizacionim jedinicama, u vezi sa članom 12. stav (5) ovog Pravilnika, odnosno utvrdi nepravilnosti u provođenju izbora koje su utjecale ili mogle utjecati na rezultate izbora, uputit će inicijativu predsjedniku Skupštine Studentskog parlamenta o poništavanju izbora. Ukoliko predsjednik Skupštine Studentskog parlamenta utvrdi opravdanost inicijative, o tome će obavijestiti Izbornu komisiju i birački odbor, koji su proveli izbore, te donijeti odluku o poništavanju izbora i imenovanju novog biračkog odbora koji će ponoviti izbore na organizacionoj jedinici koja je bila predmetom razmatranja.

(3) Skupštine Studentskih vijeća/Udruženja SC održat će se najkasnije sedam dana od dana objavljivanja konačne rang liste.

V. POSTUPAK PROVOĐENJA IZBORA U SKUPŠTINI STUDENTSKOG VIJEĆA/UDRUŽENJA SC

Član 18.

(1) Skupština Studentskog vijeća/Udruženja SC usvaja svoj Statut, nakon prethodno pribavljene saglasnosti Predsjedništva Studentskog parlamenta.

(2) Skupština Studentskog vijeća/Udruženja SC iz svojih redova, postupkom javnog glasanja, bira predsjednika i zamjenika predsjednika Studentskog vijeća/Udruženja SC, predsjednika i zamjenika predsjednika Skupštine Studentskog vijeća/Udruženja SC, sekretara i zapisničara.

(3) Skupština Studentskog vijeća/Udruženja SC iz svojih redova, postupkom javnog glasanja, bira članove Upravnog odbora Studentskog vijeća/Udruženja SC u skladu sa članom 5. ovog Pravilnika.

(4) Skupština Studentskog vijeća/Udruženja SC iz svojih redova bira i imenuje pet članova za Skupštinu Studentskog parlamenta, postupkom javnog glasanja, između kojih je obavezno prvi član predsjednik Studentskog vijeća/Udruženja SC.

(5) Sve funkcije navedene u ovom članu, u prvom krugu izbora, biraju se nadpolovičnom većinom glasova članova Skupštine.

(6) Ukoliko niti jedan kandidat u prvom krugu glasanja ne dobije potrebnu većinu glasova, odnosno dva ili više kandidata dobije isti broj glasova, glasanje se ponavlja za te kandidate.

(7) U ponovljenom glasanju iz stava (5) ovog člana izabran je onaj kandidat koji eventualno dobije nadpolovičnu većinu glasova od ukupnog broja prisutnih članova Skupštine.

Član 19.

(1) Kandidat za predsjednika Studentskog vijeća/Udruženja SC ne može biti predsjednik drugog Udruženja građana, po horizontalnoj osnovi.

(2) Predsjednik Studentskog vijeća/Udruženja SC izričito je redovan student fakulteta/ADU, odnosno stanar Studentskog centra Univerziteta u Tuzli.

(3) Predsjednik Studentskog vijeća/Udruženja SC prije biranja na tu funkciju treba imati određeno iskustvo, odnosno morao je već ranije biti uključen u rad Studentskog vijeća/Udruženja SC, u smislu rukovođenja ili članstva u organima i sekcijama tog Studentskog vijeća/Udruženja SC, ili članstva u naučno-nastavnom/umjetničko-nastavnom vijeću fakulteta/ADU.

VI. ZAVRŠNE ODREDBE

Član 20.

(1) Ovaj Pravilnik stupa na snagu danom donošenja.

(2) Tumačenje odredbi ovog Pravilnika daje Predsjedništvo Studentskog parlamenta.

STUDENTSKI PARLAMENT
UNIVERZITETA U TUZLI
Predsjedništvo

Broj: 1-25-10/17

Tuzla, 25.10.2017. godine

M.P.

Predsjedavajući Predsjedništva
Studentskog parlamenta Univerziteta u Tuzli

Nedžad Hodžić